



26. januar 2023

UPA2023/120

Matumuuna Inatsisartut suleriaasiat § 33 najoqqutaralugu Inatsisartut aalajangiiffigisassaattut siunnersuut nassiupparput:

Utoqqalinersiaqarneq pillugu Inatsisartut inatsisaat nr. 20, 23. november 2015-imeersoq kingusinnerusukkullu allannguutit ilanngullugit allanngortinneqarnissaannik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, utoqqalinersiaqarneq aapparisaq isertitai tunngavigalugit allanngortinneqartarunnaarnissaat anguniarlugu.

(Inatsisartuni ilaasortaq Jens NapātôK', Naleraq)

Tunngavilersuut:

Naleraq ataqqinartumik peqqissumillu assigiinngisitsinani utoqqalisoqarnissaanik illersuisuuvoq, taamaattumik Naleraq isumaqarpoq misissuinerminngarnit aamma isumalioqatigiissitaliornermit piffissanngortoq utoqqalinersiaqarneq pillugu inatsisip aaqqinneqarnissaanut.

Naleraq isumaqarpoq utoqqalinersiat aappap isertitai najoqqutaralugit iluarsineqartassanngitsut aamma pineqartoq Inatsisartuni ukiuni amerlasuuni eqqartorneqartareerpoq, soorlu aamma ukiut amerlasuut ingerlaneranni qineqqusaarutaasarsimasoq, utoqqaat neriorsorneqartarput utoqqalinersiat aaqqinneqassasut, kisianni ullumimut allannguutinik imaluunniit aaqqiissutinik malunnartunik pisoqarsimanani.

Naleraq isumaqarpoq piffissanngortoq inatsisip allannguutissaanik iliuuseqartoqarluni, imaalillugu aappap isertitai apeqqutaatinnagit assigiinngisitsiunnaartitsilluni.

Ajornartorsiut uteqqattaartuarpoq aamma sammisaq uteqattaarpoq, taamaattumik inatsiliorneq allanngortittariaqarparput, ilisimasat paasissutissallu naammattut pigineqarmata aalajangiinissamut toqqammavissat.



Naleraq oqaaseqartarpoq utoqqalinersiat pillugit nutarterisoqassasoq suleqatit attuumassusillit suleqatigalugit, utoqqalinersiaqarneq utoqqarnut paasiuminarnerusoq aamma minnerunngitsumillu aqukkuminarnerusoq angullugu.

Utoqqalinersiaqarnerup pisariinnerusup allaffissornermi tiimerpassuit atorpeqartartut sipaarneqassagaluarput aamma nunami atuisunut tamanut paasiuminarnerulissagaluarpoq, taamaalilluta utoqqaat utertoofigissagaluarpagut ukiorpassuarnimi inuiaqatigiinnik kivitseqataasimmata sulillutik, aamma tamanna pillugu ataqqinartumik peqqissumillu utoqqalissagaluarput immikkoortinneqartutut misiginatik aamma illoqutigiinnut nanertuutaasutut misiginatik. Naalakkersuisut ilisimatitsererput 6 mio. kr¹. naleqassasoq pilersuisussaaneq ataatsimoortoq utoqqarmut ataatsimut peerneqassappat, naak aningaasarpassuarnik naleqarpasikkaluortoq, kivitseqataarusuppugut inuit ataasiakkaat ataqqinassusiat peqqissusiallu qaffarsarniarlugu utoqqartavut assigiimmik pinerisigut, aamma tamanna aningaasaliineruvoq immini angisooq.

Pitsaasumilli kinguneqassaaq allaffissorneq ilaatigut annikillisinneqassammat, tassani inuup ataasiakkaap pissarsiassai naatsorsornissaa pisariaarutissammat. Akerleriit taakku marluk tamarmik ajugaatitsissapput, tassani utoqqaap ataqqinassusia aamma peqqissusia qaffanneqassammat allaffissornikkut sipaagaqarneq ilutigalugu.

Tungavilersuutit taakku atorlugit Naleqqamit kissaatigaarput Inatsisartuni partiit aamma Naalakkersuisut utoqqalinersiat pillugit inatsisip allannguutissaatut siunnersuummut isumaqataassasut, tassani Naalakkersuisut piumaffigineqassapput utoqqalinersiat pillugit Inatsisartut inatsisaat nr. 20, 23. november 2015-imeersup allanngortinnissaanut, tassani utoqqalinersianik tunineqarnerup aaqqinneqartassasut aapparisp isertitai najoqqutarinagit.

Pisortanut aningaasatigut allaffissornikkullu kingunerisassai:

Naalakkersuisut ilisimatitsererput 6 mio. kr. naleqassasoq utoqqalinersialinnut pilersuisussaaneq ataatsimoortoq peerneqarpat.

Utoqqartavut assigiimmik pinerisigut aamma tamanna aningaasaliineruvoq immini angisooq.



Naleraq

Pitsaasumilli kinguneqassaaq allaffissorneq ilaatigut annikillisinneqassammat, tassani inuup ataasiakkaap pissarsiassai naatsorsornissaa pisariaarutissammat.

Namminersortunut aningaasatigut allaffissornikkullu kingunerisassai:

Namminersortut ilaannut utoqqalinersialinnut pilersuisussaaneerup peerneqarnissaa iluaqutaassaaq.

Innuttaasunut aningaasatigut allaffissornikkullu kingunerisassai:

Sullissineq tamanut eqaanneq sukkanerlu aamma allaffissornermi aningaasatigut sipaartoqassaaq.